

## Tunapaswa Kuwatendea Jirani Zetu Mema

Usiwayime watu mema yaliyo haki yao, Ikiwa katika uwezo wa mkono wako kuyatenda—**Mithali 3:27.**

Moyo wa Mwokozi uko tayari na una shauku kubwa ya kutukaribisha kuwa wana wa familia ya Mungu, kiasi kwamba katika maneno ya kwanza kabisa tunayopaswa kutumia katika kumwendea Mungu, anaweka uhakikisho wa uhusiano wetu wa Mungu,—“Baba Yetu.” ... Katika kumwita Mungu Baba yetu, tunawatambua watoto Wake wote kuwa ndugu zetu. Sisi tu sehemu ya mtandao mkubwa wa binadamu, washirika wote wa familia moja. Katika maombi yetu tunalazimika kuwajumuisha jirani zetu pamoja na sisi. Hakuna mtu aombaye istahilivyo aombaye baraka kwa ajili yake mwenyewe.

Tumeunganishwa na Bwana kwa vifungo imara na udhihirisho wa upendo wa Baba yetu unapaswa kuamsha upendo wa kindugu na shukrani kubwa. Sheria za Mungu zina msingi wake katika unyofu usiobadilika na zimetungwa ili kwamba ziamshe furaha ya wale wazishikao.

Katika somo la imani ambalo Yesu alilifundisha mlimani, kumefunuliwa kanuni za dini ya kweli. Dini inamleta mtu katika uhusiano binafsi na Mungu, lakini sio pekee; kwani kanuni za mbinguni zinapaswa kutekelezwa, ili ziweze kusaidia na kuwabariki wanadamu. Mtoto wa Mungu wa kweli atampenda kwa moyo wake wote na jirani yake kama nafsi yake. Atawapenda wanadamu wenzake. Dini ya kweli ni kazi ya neema moyoni, inayofanya uzima kutiririka katika matendo mema, kama chemchemi iliyonyweshwa kutokana na vijito vilivyo hai. Dini haihusiani tu na kutafakari Neno la Mungu na kuomba. Nuru ya Mkristo inaoneshwa katika matendo mema na ndivyo inavyotambuliwa na wengine. Dini sio kujitenga na shughuli za maisha. Ni kueneza na kutakasa shughuli na biashara zake. Ikiwa mtu ameunganishwa kwelikweli na Mungu na mbingu, roho ikaayo mbinguni itaathiri maneno na utendaji wake wote. Atamtukuza Mungu katika kazi zake na kuwaongoza wengine kumheshimu Yeye.